

**Uunga siunnersuut: Illulortiternernut aningaasalersuineq pillugu inatsisip allanngortinnissaa pillugu Inatsisartut Inatsisaat**

(Tullerriiarinissamut uppernarsaaneq, sanaartortitsinernut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il.)  
(Ineqarnermut Attaveqaasersuutinullu Naalakkersuisoq)

**Saqqummiussissut**

(Ineqarnermut Attaveqaasersuutinullu Naalakkersuisoq)

**Siullermeerneqarnera**

Naalakkersuisut sinnerlugit matumuuna illulortiternernut aningaasalersuineq pillugu inatsisip allanngortinnissaa pillugu Inatsisartut Inatsisaannut siunnersuut saqqummiutissavara.

Siunnersuut ineqarnermi iluarsaaqqinnerup atuutsinneqalerneranut ilaatinneqarpoq, aammalu *Ineqarnermut aningaasalersueriaatsinik nalilersuinermit* inassuteqaatit aallaavigeqarlutik. Naliliinermi naapertuutinningsut arlallit uparuarneqarput, taakkualu allannguutissatut siunnersuummi matumani iluarsiniarneqarput.

Kommunit aaqqissuussinernik allaffissornikkut aqutsinerisa oqilisaaffiginissaat, inuiaqatigiit aningaasaataannik pitsaanerpaamik atuinissamik qulakkeernissaq, innuttaasullu aaqqissuussinernik atuinissamut periarfissaannik pitsanngorsaannissaq, allannguutissatut siunnersuummi anguniarneqarpoq.

Siunnersuummi immikkoortut pingaarnerit makkua erseqqissarusuppakka:

- Erseqqissarneqarpoq inissiat pisortanit taarsigassarsititsivigineqarsimasut taamaallaat najugaqarfissatut atorneqaqqusaasut. Aningaasat inuiaqatigiit inissiamik pilersuinerulernissamut aningaasaliissutigisimasaasa, aamma inissianik pissarsiarineqarsinnaasunik amerlanerulersitseqataasimanissaat, taamaalluni qulakkeerneqassaaq. Inissiamik piginnittoq imaluunniit attartortoq inissiamiit annikinnerusumik, namminersorluni inuussutissarsiornermik suli ingerlataqarsinnaassaaq.
- Illuummi taarsigassarsiat siuliiniittut allanngortinnissaannut imaluunniit allatut pingaarnersuinermit ilaatillugu, ilanngullugu illuummi akiitsorineqartut ilanngunnagit illup nalinga qularnaveeqqusiullugu taarsigassarsinermi, taarsigassarsiat siuliiniittut siulliullugit akilersorneqassasut ilanngussinissamik akuersinissamut pisortat taarsigassarsititsisartut piginnaatinneqarput. Siunertaavoq innuttaasut inissiaq pigisartik qularnaveeqqusiullugu ataatsimut katillugu taarsigassarsiaminnik

ingerlaavartumik naleqqussaaniissamut pitsanngorsaaniissamullu periarfissaannik pitsanngorsaaniissaq.

- Kommunalbestyrelsi ingerlaavartumik iluarsaassinissamut nutarterinissamullu taarsigassarsianik tunniussinissamut piginnaatinneqarpoq. Tamanna inoqarfinni minnerusuni nutarterinissamut taarsigassarsinissamut periarfissaqarnermut pitsaasumik sunniuteqassasoq naatsorsuutigineqarpoq.
- Pisortanit taarsigassarsiat naleerukkiartortut isumaqarlutik, kommunit naliliinermut atatillugu erseqqissarpaat. Anigorniagassaq taanna pinngitsoortinniarlugu siunnersuutigineqarpoq, kingumut naatsorsuilluni ernialiisarnermi Naatsorsueqqissaartarfiup qaammatinut 12-inut kingullernut atuisartunut akigititanut naleqqersuutaani allannguut kingulleq naatsorsorneqartoq 1 procentpointinik ilallugu, siunissami aallaavigineqartalissasoq.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngortippara.